

Òrganista

Pioter Depta, òrganista
Grajk a spiéwòk szerok znóny
Sòdł do òrganów, jaż gwizda,
Czej ba częc nôpierszé tónë

Prawą rãką grô melodiã
Drëgã - harmóniã towarzy
Nodzi chòdzą donąd-òdnãt
Spiéwò do tegò jak aniól

A nôpiãkni ne marijné
Dze co trzecé słówkò "ave"
Jak sã nadmie, jak wëcygnie -
Białczy sã wierzgòla w ławie...

Na pògrzebach i na zdënkach
Zwëskù wicy miól jak ze mszów
Czej z òplòtkã chòdzył pò wsach,
Żniwa bëłë nié nògòrszé...

Przed kòmóniã mùszòł dzecë
Piesniów czile pòwëuczëc
Nieròz jich czëjącë wëcy
Chcòł w nich łówką z chùru rzucëc...

Pioter, póczi bëł kawalér
Spiéw prowadzył na wiesoło
Czej ksądz białkã mù narajił
Z durów przesadzył do molów...

Dëtków zrobia sã za mało
Pòłwã w krómach wëkùpionò
To, co z kòscoła zahalòł
Òna miks mia rozmienioné...

Przëszło Depce do etatu

Dobrac granié pò wiesołach
Prosto z pòprawinów jachôł
Na mszą reną do kòscoła...

Sã zdzëwòwa wiérné ómczi,
Co w swiãtnicë wcyg mùrmòta
Czedë Pioter, w mól kòrunczi
Mùzykòwôł "do kòtleta"

Probòszcz dostôł wiôldzich òczów
Czej na Dzãkczënié zwòniã
A ten w kòzã spiéwã skòcził
"Love me tender" zwãczy plëną...

Jaż kùreszce, w Wiôldzim Pòsce
Ksądz: "Biôj z Bògã" rzeknął Depce
Cyc sã ùrwôł òrganisce
Przesta cec z parafie piëndze...

Terô zódnëch "alelujów"
Pioter wiãcy nie zaczinô
Czedë tãskno mù do chùru,
Nócy so "Salve Regina"...

Tómk Fópka, Chwaszczëno, 15 maja 2020 rokù, gòdz. 19.47